

## LI PAYISAN ET L' SAUVERDIA.

On djoû qu' gn-aveut one masse di nîve,  
Dj'a atrapé on sauvèrdia.  
Li p'tit voleûr tron.neut lès fîves,  
Èt s' co.oudri, vos n' saurîz mia.

« Djè l' saveu bin qu'on djoû, dj' t'aureûve ! »  
Lî a dj' dit, au p'tit crapuleûs.  
« À t' place, canaye, dji rodjireûve !  
Comint faîs' po n' nin yèsse onteûs ?

T'èsteus tofêr à mès cèréjes,  
À mès salades, à mès p'tits pwès,  
Quand ç' n'èsteut nin autoû d' mès fréjes,  
Mins ç' còp-ci, dji t' tin, sés', valèt.

Èt quand dj'aleu sognî mès pouyes,  
Ti t' planteus come on franc tigneûs,  
Èt rîre di mi, pad'avant mès-ouys,  
Avou tès-aîrs di vî bribeûs.

Ti choyeus tès spales come po s' foute.  
Dj'a yeû bau mète on spawèta,  
Avou t' feume, vos m' rèspondîz : « Proute ! »  
Tot chitant d'ssus, èt rîre au d'la.

Ti m'enn'as trop faît, d' totes lès sôtes.  
T'aveus t' plaîji di m' fé couru.  
Asteûre, nos-alans fé nos comptes,  
Ci còp-ci, dji n' ti lacherè pus.

T'as profité assez di t' chance.  
Li timps dès piyadjes èst d'dja lon.  
Après awè tant faît l'aspanse,  
Trop taurd po v'nu d'mander pârdon.

– On-amètu, vos l' faut comprinde,  
Divant qu' on n' crîye qui s' compte èst bon  
A l' drwèt d' s'èspliquer po s' disfinde !  
Sèroz di m'-y-avis ? Dj'è rèspond !

Ni v's-ont-t-i nin sovint faît braîre,  
Vos frères, vos cousins, vos tayons ?  
Dji n' vos-a jamaîs v'lu displaîre,  
Minme si dj'a stî mwints còps capon !

Si, seûlemint, vos dôriz one miète  
Di ç' qui, tos lès djoûs, toûne à rin,  
Gn-aureut d'dja pus dandjî d' champète  
Po couru après lès vaurins.

Mi, dji n' faî pont d' mau à pèrson.ne ;  
Èstoz sûr d'è p'lu dîre ostant ?  
Nos-avans appris à nos djon.nes  
À s' taîre èstô d' fé dès cancans.

Dji n' mi mèle jamaîs d' politique,  
Dji n' jin.ne pèrson.ne di ç' costé là.

Sins m'ocuper dès djins, dji vike  
Mi p'tite vîye di bon sauvèrdia.

Tos lès djoûs, c'èst mi qu'èst d' corwéye !  
Dji n'a jamais stî fènèyant.  
Faut qui dj' trime po noûri m' pèkéye,  
Mi èto, dj'a dès p'tits-èfants.

I chonereut co bin qu' dj'a aujîy,  
Qui dji n' paye pont d' contribucions ;  
Tant qu'à mi, dji sowaîte afiye  
Qu'on lève dès taves po fé m' pension.

Audjoûrdu, gn-a pus qu' dès tracteûrs !  
Dins l' timps, nos-avins co lès tch'vaus  
Qui leûs gros strons, à timps à eûre,  
Nos spaurgnin.n' di tûzer à mau.

Nosse vî cinsî, quand i mèchneûve,  
N'a jamais manqué d' fé plaîji.  
Sins r'waîtî trop près, i lèyeûve  
One paurt po tos lès p'tits come mi.

Nos fé passer po dès voleûrs !  
Nos-ôtes, pôves pitits sauvèrdias !  
C'èst l's-alènes qui front vosse maleûr  
Dimwin, quand nos n' sèrans pus là.

Lès p'tits plaîjis qui, po l'oneûr,  
Li feume èt mi, nos v's-alouwans,  
Si v's-aurîz por one çans' di keûr,  
Ça vaut cint côps ç' qui nos v' divans !

– I-gn-a do vraî dins ç' qui t' vins d' dîre !  
Pa côps, on n' tûze nin lon assez.  
Tot bin pèsé, èstô d'è rîre  
On d'vreut copler lès pus fayés ! »

La-d'ssus, dj'a lachî li p'tite bièsse.  
Mins là qu' nosse vaurin, en l' trossant,  
Covole jusse au d' dizeû di m' tièsse,  
Po lachî s' crote, li disgostant.

Janvier 2011.  
Albert Delvaux.

Si co.oudri : se débattre.  
On spawèta : un épouvantail  
On-amètu : un accusé.  
Lèver dès taves : prélever des retenues.